

La bova dad Elm

DA JOHANN ULRICH SCHLEGEL

■ **Avant 125 onns, ils 11 da settember 1881, èn sa distatgads al Tschingelberg, al sidost dal vitg dad Elm, radund diesch milliuns meters cubic da la muntogna ed han sutterrà l'Untertal fritgaivel ed abità. Sco quai ch'igl è bunamain adina il cas tar bovas n'è la catastrofa betg vegnida tut surura; mess en moviment la bova ha la finala la plievgia intensiva da plirs dis.** Indizis avevi gia dà avant: crappa che vegniva libra, sfessas e terratsch en moviment. Plinavant era l'industria da minieras stada fitg malprecauta ed engurda cun explotar il crap da la muntogna. Nagin n'aveva dentant pudì prevesair la dimensiun da la catastrofa.

Ina da las pli grondas catastrofes en muntogna

Tenor ils rapports ha la bova custà la veta a 114 abitants. Entiras schlattas èn vegnidas extinguidas. 37 uffants èn morts e 38 han survivì sco orfens. En tut han ins prendì ord la bova 31 baras, per il pli grevamain mutiladas. Ils auters morts n'han ins mai chattà. Ina surfatscha enorma da 900 000 meters quadrat terren agricul è vegnida destruida, plinavant grondas surfatschas da gaud, 83 chasas, 50 stallas e clavads ed ina miniera. La gronda part dal muvel pasculava anc sin las alps ed ha damai survivì.

La bova – ina disditga umana?

Il 1868 avev'ins cumenzà ad explotar plattamorta al Tschingelkopf. Quest crap aveva da quel temp ina gronda valur. Adattadas per l'exploraziun eran mo paucas regiuns. Per gudagnar spert raps u ord ignoranza e malprecauziun han ins cumenzà ils onns 1879 a rumper ora singulas parcelas da plattamorta. Quellas eran da qualitad excellenta, ma servivan sco pilasters purtants a l'intern da la muntogna. La finala è sa furmà al Plattenberg, il lieu inicial da la catastrofa, in spazi vid da 180 meters larghezza e radund 20 meters profunditad en la muntogna. Privada da ses sustegn principal, pendeve la muntogna ils onns 1881 sur la val. Questa malprecauziun n'ha betg anc chaschunà la bova. Pir las plievglas constantas a la fin d'avust e l'entschatta da settember han manà a la catastrofa.

Praders da blais returnads a chasa l'avust da l'alp Tschingel avevan raquinatà che la sfessa gia existenta en la muntogna sa schlargia adina dapli. Ella era ussa tranter dus e trais meters largia. Ed il terren sut la sfessa era sfunsà per quatter fin tschintg meters.

Tut quai signalisava che la muntogna era sin via da cupitgar: sisum era ella stgarpada dapart e giudim n'aveva ella nagin sustegn pli.

La dumengia dals 11 da settember 1881 aud'ins dapi l'avantmezdi a schluppegiar, sfratgar e ramplunar al Tschingelberg, e quai da tala maniera che la canera disturba schizunt il servetsch divin en la baselgia dad Elm. Ma la bova na fa betg preschas. Igl è in quart passà las tschintg il suentermezdi cura che l'emprima sbuvada vegn.

Las trais fasas da la disgrazia

Il ramplunar da la muntogna ed il cupitgar constant da crappa avevan attratgblers mirveglius. Qua sa distatga la muntogna al Gelberkopf e sa derscha en in'emprima fasa a val. La glied raiva sin la costa visavi e sa senta en segirezza. Magasins da la miniera ed in'ustaria ch'ins aveva evacua ordavant vegnan demolids. Unfrendas na datti naginas en quest'emprima fasa. En la planira sa prepara la glied en panica per la fugia. Vischins curaschus vegnan ad els en agid e curran qua tras directamain en lur malura. Ussa cumenza la catastrofa pir da dretg.

17 minutas suenter l'emprima sbuvada datti puspè in sfratg al Tschingelberg. I suonda ina segunda sbuvada. Sin l'au-



Cun sfracass starmetus è la bova sa derschida a val.



La devastaziun è stada enorma.

FOTOS MAD

tezza da la miniera rebatta la crappa sin il nas da la muntogna, dat per uschè dir in sigl en l'aria e cupitga giu amez il fund da la val. Gia avant che las massas da la bova rebattan per terra sragischa l'enorma pressiun d'aria las plantas, suffla davent ils tetgs da las chasas e las fa crudar ensemen. Dal chau dal Plattenberg èn sa distatgadas enormas massas da grip che sustegnevan enfin là la muntogna. En curt vegn l'entir chau a crudar. I vargan anc trais enfin quatter minutas. Alura cuntanscha la catastrofa sia culminaziun: il chau dal Plattenberg sbaluna. Questa terza fasa decida definitivamain il destin da las unfrendas.

La terra trembla, las massas da la muntogna schluppegian cun grond fracass sin ils grugns dal massiv. Il tschiel sa stgirenta. Nivels nairs da pulvra prendan tutta vesida. Era ils umans da l'autra vart da la val èn sin la fugia. Els èn ussa gist uschè periclitads sco quels che curran da la val ora. Là capita ina chaussa curiusa: las massas da crappa sitga vegnan tuttenina liquidas e sa derschan en furma da flum da glitta en ina spertezza orrenta da bunamain 200 kilometers l'ura tras la cuntrada quasi planiva devastond la surfatscha enorma menziunada.

Destins

Cura che l'emprima bova è vegnida ha ina dunna cun num Elsbeth Elmer prendì duas mattinas per il maun per fugir. Il medem mument ha ella clamà a ses sir ed a sia sira ed ad in auter um vegl da suandar ella e da curre sin da la spunda visavi. Entant che la giuvna dunna cun ils dus uffants ha gia cuntanschì ina nischa pli ad aut, èn ils trais vegls restads enavos

spussads ed èn vegnids sturnids da la crappa.

D'ina outra famiglia ha sulet ina matetta dad otg onns survivì. Ses bab, sia mamma, ses aug e ses tschintg fragliuns èn vegnids per la vita.

Medemamain sin la spunda visavi, aut siador sin il Düniberg, viveva sin in bain isolà il pur Christoph Elmer e sia dunna cun il figl betg maridà. Cura che la bova è rutta ora èn ils dus umens currids da la spunda giu per gidar ils periclitads. Els èn currids directamain en lur perdita. La mammetta en ses dachasa isolà sin la muntogna era ussa anc pli bandunada.

Sensaziun ed agid

La disgrazia ha fatg gronda sensaziun. Anc emnas suenter l'eveniment vegnivan entirs trens plains da glied mirvegliusa en Glaruna. Da Turitg e da S. Gagl devi trens spezial en la regiun da catastrofa. Ils esters paran dentant dad esser sa cumportads per la gronda part cun disciplina. Ils gèsts da solidaritad predominavan il regl da sensaziun.

En l'entira Svizra è vegnì collectà per il vitg dad Elm devastà. Las regenzas chantunales e la confederaziun han purtà agid immediat. Da tuttas varts dal mund vegnivan daners d'agid. Mintga continent era represchentà: da l'America dal nord a l'America dal sid, da l'Africa fin a l'Australia. Schizunt il Giapun, la Rumenia, las Filippinas, la Turchia e la Russia han purtà agid.

La catastrofa resta en la memoria. Ella è era in segn per la finitad da nus umans e per la necessitad indispensabla da gidar in l'auter.